

**Inuutissarsiutinut ilinniartitaanermi pikkorissartitsinerit sulisitsisut inuutissarsiutinut ilinniartitaanermut akiliutaannit (AEB) aningaasalersorneqartut pillugit Namminersornerullutik Oqartussat nalunaarutaat nr. 18, 20. maj 1998-imeersoq**

Sulisitsisut inuutissarsiutinut ilinniartitaanermut akiliutaat (AEB) pillugit Inatsisartut inatsisaanni nr. 16-imi, 23. november 1989-imeersumi § 8 naapertorlugu aalajangersarneqarput:

**Kapitali 1.**

Siunertaq nalinginnaasumillu aalajangersakkat.

§ 1. Pikkorissartitsinerit tapiissuteqartarnerup siunertaraa sulisartut ilinniagallit ilinniagaqanngitsullu ilinniagaqaqqilluni ingerlaqqiffiusumillu pikkorissartitsinerit, suliffeqarnermi pisariaqartit naapertorlugit inuussutissarsiorsinnaanermi piginnaassutsinik ataavartitsisuni, annertusaasuni pitsangorsaasunilu peqataanissamut periarfissinneqarnissaat, taakkununga ilaallutik suliffissaaleqisut pisariaqartinneqartumik ilinniarteqqitaanissaat kiisalu suliffeqarnermi allangortitsinerit sungiussiniarnermilu ajornartorsiutinik ikiorsiinissaq.

§ 2. Pikkorissartitsinerit nalunaarut una malillugu tapiiffigineqarlutik ingerlanneqartut, inuussutissarsiutinut ilinniarfinit isumagineqassapput, taamaalilluni ilinniarfiit ilinniartitsissutigisartakkamik iluanni pikkorissartitsineq aqullugulu ingerlanniassammassuk.

Imm. 2. Pikkorissarnissat, suliamut atatillugu immikkoortut immikkut ittut iluanniittut, inuutissarsiutinullu ilinniarfinit isumagineqarsinnaanngitsut, inuutissarsiutinut ilinniarfiup inassuteqareerneratigut inuutissarsiutinut ilinniarfiit avataanni ingerlanneqarsinnaapput. Inuutissarsiutinut ilinniarfiup allaffissorneq pikkorissartussat pikkorissarneranni isumagissavaa.

Imm. 3. Imm. 1 aamma 2 naapertorlugu pikkorissarnerit tamanut ammasumik neqeroortigineqassapput.

§ 3. Inuit ataasiakkaat pikkorissarnissaannut tapiissuteqartoqarsinnaavoq, pikkorissarnerit Kalaallit Nunaanni inuutissarsiutinut ilinniarfinit neqeroortigineqanngitsunut. Inuutissarsiutinut ilinniarfiit imaluunniit Kultureqarnermut, Ilinniartitaanermut Ilageeqarnermullu Pisortaqaqfiup tamatumunnga piginnaatitaata, pikkorissarnerit pikkorissartussat peqataaneranni allaffissorneq isumagissavaat.

§ 4. Pikkorissartitsinerit nalunaarut una malillugu tapiiffigineqarlutik ingerlanneqartut, sapinngisaaq naapertorlugu inissinneqartariaqarput sumiiffimmi, § 11 naapertorlugu angalanermi ilinniarfimiinnermilu aningaasartuutit sapinngisamik annikitsuunissaat siunertaralugu.

§ 5. Tapiissuteqartoqarsinnaanngilaq AEB-mit tapiissutit assinginiq, aningaasartuutiniq matussusiinnaasunik, allamit tapiisoqarsinnaappat.

## **Kapitali 2.**

Tapiiffigineqarnissamut piumasaqaatit.

**§ 6.** Pikkorissartitsinernut Kultureqarnermut, Ilinniartitaanermut Ilageeqarnermullu Pisorta qarfirmmit akuerineqartunut tapiissuteqartoqartarpoq.

Imm. 2. Tapiissutit AEB-mi aningaasat katersukkat sukkulluunniit uninngasuutinit tapiissuteqartoqartarpoq.

**§ 7.** § 2 naapertorlugu pikkorissarnernut minnerpaamik ullunik tallimanik sivisussuseqarlutik ulluklut atuarnertut ingerlanneqartunut minnerpaamillu inunnit arfinilinnit peqataaffigineqartunut tapiissuteqartoqartarpoq. Taamaattoq pikkorissarnernut sivikinnerusumik ingerlanneqartunut sulinikkut isertitassanik annaasanut tapiissuteqartoqarsinnaavoq.

Imm. 2. § 3 naapertorlugu pikkorissarnernut minnerpaamik ullunik tallimanik sivisusseqarlutik ulluklut atuarnertut ingerlanneqartunut tapiissuteqartoqartarpoq.

Imm. 3. Kultureqarnermut, Ilinniartitaanermut Ilageeqarnermullu Pisorta qarfiup immikkut ittumik pissutissaqartillugu imm. 1-imi aalajangersakkat avaqqussinnaavai.

**§ 8.** Pikkorissartut tapiissutisinnissaannut piumasaqaataavoq pineqartoq tassaassasoq  
1) sulisitsisoq imaluunniit sulisitsisumi, sulisitsisut inuutissarsiuutitut ilinniartitaanermut akiliutaat pillugu inatsisartut inatsisaanni § 1 naapertorlugu akiliuteqarnissaminut pisussaataasumi suliffeqartoq, imaluunniit  
2) suliffissaaleqisoq kommunillu najugaqarfiup uppersarsinnaappagu, suliffissaaleqisup suliffittaarnissamut periarfissai pikkorissartitsinerup naammassereerneratigut annertuumik pitsanngoriaateqassasut.

Imm. 2. Pikkorissarnissanut peqataaniarluni nalunaarneq sulisitsisumit suliffissaaleqisunullu atatillugu kommunimit isumagineqassaaq.

Imm. 3. Imm. 1, nr. 1 naapertorlugu pikkorissartunut tapiiffiginnittoqarsinnaanngilaq pineqartup sulisitsisua AEB-mut akiliutinik akilerneqartussanngorsimasunik akiliinngitsoorsimappat. Akileraartarnermi Pisorta qarfiup sulisitsisut AEB-mut akiligassaminnik kinguaattoorutaat pillugit paasissutissat ingerlateqqittassavai.

**§ 9.** Pikkorissartut 18-inik ukioqalereersimassapput, Kalaallit Nunaanni najugaqartuullutik pikkorissarnissamilu ilinniagaqarnikkut piumasaqaatitut aalajangersagaasunik equutsitsisimasariaqarlutik.

Imm. 2. Kultureqarnermut, Ilinniartitaanermut Ilageeqarnermullu Pisorta qarfiup imm. 1-imi ukiorisassatut piumasaqaataasoq immikkut illuinnartunik pissutissaqartillugu avaqqussinnaavaa.

**§ 10.** Pikkorissartup tapiissutisinnaatitaanera atorunnaassaaq, pineqartup pikkorissarneq maanaanaq unitsippagu. Taamaattorli Kultureqarnermut, Ilinniartitaanermut Ilageeqarnermullu Pisorta qarfiup immikkut ittunik pisoqartillugu tamanna avaqqussinnaavaa, pikkorissarnermik unitsitsineq pikkorissartitsinermi pisorta q allakkatigut isumaqatigiissuteqarfigineqarsimappat.

### **Kapitali 3.**

Tapiissutit annertussusaat tunniunneqartarnerallu.

**§ 11.** Pikkorissartunut tapiissutit tunniunneqarsinnaapput

- 1) sulinikkut isertitassanit annaasatut,
- 2) pikkorissarfimmut pikkorissarfimmiillu angalanernut aningaasartuutitut akiliutitut, taakkununga ilaallutik angalanerup nalaani akunnittariaqarnermi aningaasartuutit pisariaqartut, aamma
- 3) pikkorissarnerup nalaani ineqarnermut nerisaqarnermullu aningaasartuutitut akiliutitut.

Imm. 2. Imm. 1, nr. 1 naapertorlugu pikkorissartut sulinikkut isertitassanik annaasaat matussuserneqassapput, SIK-p aamma Kalaallit Nunaanni Naalakkersuisut ilinniagallit ilinniagaqarsimanngitsullu pillugit isumaqatigiissutaanni akissarsiat alloriarfianni 1-imi aningaasarsiap annertoqataanik. Taamaattorli pikkorissartunut 18-it inorlugit ukiulinnut § 9, imm. 2 naapertorlugu immikkut akuersissuteqarfigineqartunut tapiissuteqartoqassaaq SIK-p aamma Kalaallit Nunaanni Naalakkersuisut ilinniagaqanngitsunut 18-it inorlugit ukiulinnut tunngaviusunik aningaasarsiat pillugit isumaqatigiissutaasa assingannik.

Imm. 3. Taamaattorli imm. 1, nr. 1 atuutinngilaq pikkorissartunut, pisortani suliffeqartunut.

**§ 12.** Ilitsersuisut angalanerinit, ineqarnerinit nerisaqarnerinullu aningaasartuutit tamakkiisumik matussuserneqassapput.

Imm. 2. Ilitsersuisut ullormusiaqartinneqassapput Kalaallit Nunaanni Danmarkimilu atorfimmu atattillugu angalanermi aningaasartuutitut allissutit matussuserneqartarnerat pillugu isumaqatigiissut sukkulluunniit atuuttoq naapertorlugu.

**§ 13.** Immikkut illuinnartunik pisoqartillugu Kultureqarnermut, Ilinniartitaanermut Ilageeqarnermullu Pisortaqaqarfiup aningaasartuutitut §§ 11-12-mi eqqaaneqartunit allaanerusunut tapiisoqarnissaa akuersissutigisinnaavaa.

**§ 14.** Tapiissutit akiliutigineqartut feriarnersiuutissarsiuutigineqarsinnaanngillat.

**§ 15.** Tapiissutit tunniunneqassapput ullormit najukkamit aallarnermiit ullormut angerlamut apuunnermut. Tapiissutit sap. akunnerani annertunerpaamik ullunut arfinilinnut tunniunneqassapput.

Imm. 2. Pikkorissarfimmut pikkorissarfimmiillu angalaneq pikkorissarnermut atasumik pissaaq. Peqataasussap piffissami allami angalanissani kissaatigippagu tapiissutit piffissami pikkorissarfiusumiinnaq tunniunneqassapput.

Imm. 3. Angalanerit aaqqissuunneqassapput ataasiakkaanut tapiissutit tamarmiusut sapinngisamik ikinnerpaasussanngorlugit.

**§ 16.** Tapiissutit aningaasartuutitik akiliisumut sap. akunnikuutaartumik kingumoortumik tunniunneqartassapput.

Imm. 2. Sulinikkut isertitassanik annaasat sulisitsisup aningaasartuutigissavai. Suliffissaaleqisunut sulinikkut isertitassanik annaasanut aningaasartuutit kommunimit akilerneqassapput.

### **Kapitali 4.**

Atortuulersitsinermik atorunnaarsitsinermillu aalajangersakkat.

§ 17. Nalunaarut 1. juni 1998 atortuulersinneqarpoq.

Imm. 2. Ilutigalugu Inuutissarsiutinut ilinniartitaanermi pikkorissartitsisarnerit sulisitsisut inuutissarsiutinut ilinniartitaanermit akiliutaannit aningaasalersorneqartut pillugit Namminersornerullutik Oqartussat nalunaarutaat nr. 13, 26. maj 1995-imeersoq atorunnaarsinneqarpoq.

*Namminersornerullutik Oqartussat, ulloq 29. maj 1998.*

Konrad Steenholdt

/

Karl Kristian Olsen